



*Rabu, 25 Mei 2022*

**Ogen: 2 Samuel 9:1-7**



**Bagi Si Kupadanken**



**D**aud ras Jonatan ersahabat. Duana pernah erjanji maka kai pe pagi si jadi ia ras sinuruna tetap sikelengen. Situasi si lit bas paksa si e bapa Jonatan la erngena ate man Daut janah ersura-sura munuh Daud. Piga-piga tahun kenca si e Bapa Jonatan enda mate, Jonatan pe mate. Lanai ieteh Daud berita kerna Jonatan. Janah kegeluhen Daud enggo tuhu-tuhu sangap; ia erjabaten selaku raja, bayak dengen termurmur. Enterem kalak si atena erteman ras Daud. Wajar sabap kedudukan/jabatan Daud sangana mejile kel adi sigenduari sangana datas bintangna nina. Kai pe banci ilakokenna janah ras ise pe banci ia milih-milih temanna. Bage gia arah renungenta wari enda teridah maka Daud ndarami sahabatna ndube e me Jonatan. Isungkunina kerna kecibal Jonatan rikut ras keluarganya. Jonatan enggo mate, tapi lit anakna cempang e me Mipoboset.

Iinget Daud padanna ras Jonatan ndube. Aminna pe labo lit si jadi saksi, tapi idalankenna si enggo ipadankenna, tanda keleng ate nandangi sahabatna ndube, Jonathan. Isehkenna padan sibelaskenna ndube, sabap lit i je kesetianna man Dibata. Erpadan e bali kap ras erpadan man Dibata. (Ay. 3).

Daud labo terjeng erpadan, tapi nehi padanna. Tek ia maka i bas ia erpadan e lit Dibata saksina. Kinitekenna e me si njemba ia guna nekenca man keluarga Jonatan.

Adi siperdiateken ku bas kegeluhenta si tep-tep wari, uga nge ndia sikapta bas erpadan. Enggo piga kali nge sibelasken padanta? Bagi Daud ngejapken perpadanen e erkawiten ras kiniteken, niarapken kita pe sekalu ndehara ras nande mari siergaken padan sibelasken kita e. Kalak si ikut erpadan ras kita e tek kel ia maka sisehken me padan e. Janah sisehken ras langna padan e mbelin kel mpengaruhi kepercayaan kalak man banta bage pe man Tuhan, sabap ietehna maka kita enda e me moria si aktif janah banci iteki. Nepati janji e nambahi nilai dengen kehagaan geluhta kap.